

Libija Nigeru: Izručite Saadija Gaddafija

11 februar 2012 Izmijenjeno 16:32 CET

Libijska vlada želi da se sinu Muammara Gaddafija sudi za zločine počinjene nad narodom u toj zemlji



Saadi Gaddafi poručio je da će pobuna iz dana u dan biti sve veća [EPA]

Libija je u subotu od Nigera zatražila izručenje Saadija Gaddafija, sina bivšeg libijskog vođe Muammara Gaddafija, upozorivši da njegov poziv Libijcima da se pripreme za "predstojeću pobunu" ugrožava odnose dvije zemlje, javili su lokalni mediji. Saadi Gaddafi je prebjegao u Niger u septembru, pošto su snage Nacionalnog prijelaznog vijeća osvojile Tripoli i trenutno se nalazi pod kućnim nadzorom u prijestolnici te zemlje.

U telefonskoj izjavi za televiziju Al Arabiya Saadi je u petak rekao da je spreman vratiti se u Libiju "u bilo kojem trenutku" i da je u stalnom kontaktu s osobama koje su nezadovoljne aktuelnim vlastima, uključujući pripadnike vojske, policije i druge članove obitelji Gaddafi. "Pobuna postoji i bit će sve veća svakim danom. To neće biti pobuna ograničena samo na neka područja, već će pokrivati sve regione Džamahirije", dodao je on.

'Agresivne izjave'

Libijski ministar vanjskih poslova Ashour bin Hayal prenio je svom nigerskom kolegi Bazumu Muhammadu žestoko nezadovoljstvo zbog Saadijevih "agresivnih izjava". Bin Hayal je kazao da te izjave prijete da ugroze bilateralne odnose dvije zemlje i da vlada u Nigeru treba poduzeti oštre mjere protiv Saadija, uključujući izručenje Libiji, kako bi mu se sudilo za zločine protiv libijskog naroda, javila je libijska agencija LANA, a prenosi Reuters. "Nigerski ministar vanjskih poslova je izrazio žaljenje i izvinio se libijskoj vladi i narodu zbog onoga što se dogodilo, obećavši da će kontaktirati predsjednika Nigera koji je na putu, u Francuskoj", javila je LANA. Niger je ranije saopćio da će Saadi ostati u toj zemlji dok mu Ujedinjeni narodi ne ukinu zabranu putovanja. Interpol je prošle godine izdao crvenu potjernicu za Saadijem, tražeći od država članica Interpola da ga uhapse ukoliko ga pronađu na svojoj teritoriji.

Na čelu Libije trenutno se nalazi prijelazna vlada imenovana u novembru koja treba voditi zemlju do izbora u junu.

Izvori: Al Jazeera